

مسرحية

"معيز البهنسا"

أحمد عثمان

القاهرة ٢٠٠٠

جميع حقوق الطبع محفوظة

جميع الحقوق محفوظة  
جميع الحقوق محفوظة

المركز الهندسي

للطباعة والنشر

القاهرة - ٢ شارع ١٠٠ ت : ٣٧٨٦٧٤٣ - ٥٢٦٠٢٤٩

AL-BHNSA

## الإهداء

إلى أبناء قريتي ....

بنى عتمان - مركز بيا - بنى سويف

فقد تعلمت منهم الكثير...

وشربت معهم من لبن المعيز

أ.ع.



### على سبيل التمهيد

مصر هي بلد البردى، ولم يعثر على أية برديات خارج مصر فيما عدا بعض الاستثناءات البسيطة جداً. ولذلك عندما نقول علم السجدي فإن مادته هي مصرية تماماً. وغطى البردى تاريخ مصر منذ القدم وحتى بدايات العصور الوسطى. فهناك برديات مصرية قديمة ويونانية ولاتينية وقبطية وعربية. ولكن الأغلبية الساحقة من البرديات تحمل كتابات يونانية.

إذن يمكن القول إنه كان لمصر الفضل الأكبر في حفظ التراث اليوناني بفضل ورق البردى، الذي حفظته رمال مصر الجافة. وفي مصر تم اكتشاف "ستور الأثينيين" لأرسطو، وكذا خمس مسرحيات لشاعر كوميدي لم تكن لدينا من قبل له أية مسرحية، إنه مساندروس.

وفي عام ١٩٠٧ اكتشف العالمان البريطانيان من جامعة أكسفورد جرنفل B.P. Grenfell وهنت A.S. Hunt حوالى أربعمائة بيت من مسرحية سوفوكليس المفقودة "مفتقو الأثر" *Ichnetae*. أعلن هنت عن هذا الاكتشاف في الجمعية العمومية السنوية لجمعية الاستكشاف في مصر Egypt Exploration Society قائلا: "منذ ثلاث سنوات أصبحنا مدينين لبهنسا ببعض الشذرات المطولة من تراجيدية مفقودة ليوريبيديس وعنوانها "هيبسيبيلي" *Hypsipyle* واليوم يأتي دور سوفوكليس. فالاكتشاف الجديد أكثر خطورة، لأنه يسد ثغرة في معرفتنا بعبقريّة هذا الشاعر الأشهر. فلم تكن نعرف شيئا عن هذا الجانب من عبقريته حيث كان مجهولا تماما. فكما تعرفون كان يخصص لكل شاعر تراجيدي إغريقي يوم واحد في مهرجانات الدراما يقدم فيه ثلاث تراجيديات، ثم يتبعها بمسرحية رابعة عرفت باسم المسرحية الساتورية، حيث كان الساتيروى Satyroi أتباع ديونيسوس يمثلون أعضاء الكورس. وهي مسرحية قصد بها تخفيف الجو المأساوى في نهاية اليوم. ولم يصلنا من هذا النوع الدرامي سوى مسرحية واحدة شبه كاملة هي "الكولوبس" ليوريبيديس. والآن يسرني أن أعلن أنه قد صار لدينا مثل آخر جيد من

نظم سوفوكليس. فالأبيات الأربعمئة المكتشفة تمثل على الأقل نصف المسرحية.

وتقوم مسرحية "مقتفو الأثر" على موضوع الأعمال المجيدة للطفل هرميس وسرقته لقطعان الإله أبوللو واختراعه للقيثارة. وهرميس هذا هو الذى سيصبح فيما بعد فى الأساطير الإغريقية إلهاً ورسولاً لكثير الآلهة زيوس، بل وحامياً للرعاة والمراعى والطرق.

أما البهنسا فإنها تتبع محافظة المنيا واسمها القديم هو أوكسيرنخوس Oxyrhynchus. ولقد عثر بها على برديات يونانية لا تعد ولا تحصى، وكلها تلقى الضوء على الحياة الاجتماعية والاقتصادية والثقافية فى مصر. وهناك مجموعة برديات، لعلها الأكبر والأشهر، تحمل اسمها ويرمز لها بالاختصار P.Oxy. ويعرفها كل دارسى الكلاسيكيات فى كافة أرجاء العالم.

ولقد نظم الشاعر البريطانى المعاصر تونى هاريسون Tony Harrison مسرحية شعرية على أساس من الشذرات المكتشفة من مسرحية سوفوكليس "مقتفو الأثر" وسماها *The Trackers of Oxyrhynchus* عرضت لأول مرة فى دلفى باليونان ابتداء من ١٢ يوليو ١٩٨٨ ثم طافت بالكثير من بلدان العالم. وطبعت عام ١٩٩٠ ولقد التقيت بتونى هاريسون أكثر من مرة فى مصر واليونان وقبرص وتناقشت معه فى الموضوع.

ولقد رأينا فى النهاية أن نقدم صياغة مسرحية لهذا الموضوع حفاظاً على الدور المصرى فى هذا الحوار الحضارى والعالمي المثمر، حيث كانت قد انطلقت شرارته الأولى من قرية مصرية صغيرة إسمها البهنسا.

أحمد عثمان

القاهرة ٢١ نوفمبر ٢٠٠٠

### الشخصيات بترتيب ظهورها

رئيس الجلسة	: من الساسة وتبدو عليه سمات السلطة .
طه حسين	: المفكر والأديب المصرى المعروف، فى سن الشباب.
الشيخ الأزهرى	: يرتدى الملابس التقليدية ويمسك المسبحة
نالىنو	: المستشرقان المعروفان وهما من أساتذة طه
ليتمان	
مستمع من الصالة (١)	: يلعب دوره الممثل الذى يؤدى دور معزة
مستمعة محجبة	: تلعب دورها الممثلة التى تلعب دور أم على
مستمع من الصالة (٢)	: يلعب دوره الممثل الذى يؤدى دور الهرمساوى
رجب	: صاحب القهوة
معزة	: صبى القهوة
سليم البهنساوى	: عمدة البهنسا، فى الخمسينيات من عمره
خضرة	: زوجة رجب، فى الثلاثينيات من عمرها
السيسى	: خفير القرية
المغنواى	: متألق وله شوارب ويمسك الربابة دائماً، فى سن الأربعينيات
هنت	: عالمان فى البردي ، متقاربان فى السن وهو حول الخمسينيات
جرنفل	ويضعان عدسات طبية على العينين
هيلين	: سكرتيرة البعثة الأثرية فى البهنسا
الهرمساوى	: رجل العمدة وراعى معيزه فى الأربعينيات

- الرئيس عبد اللطيف : رئيس العمال فى حفريات البهنسا
- أم على : طباحة البعثة الأثرية
- الكودية : شخصية مسيطرة حادة الذكاء وثاقبة النظر وتقود طقوس الزار
- جرس : من أهل البهنسا
- عبد الله : من أهل البهنسا
- محمد ومارية : شخصيتان صامتان
- مستمع (٣) : من الصحفيين
- ( نساء القرية ويشكلن الكورس فى بعض المشاهد )



## اللوحة الأولى سنوات المضا



(فی قاعة كبيرة تتوسطها منضدة، يلتف حولها الأساتذة ومن بينهم شيخ أزهرى وطه حسين وإثنان من الأجانب هما ناليئو وليتمان. يرأس الجلسة أحد الساسة المصريين وعلى منضدة صغيرة يجلس كاتب الجلسة الذى يسجل كل شئ ولا يتكلم مطلقاً).

رئيس الجلسة: أيها السادة اجتمعنا هنا من أجل هدف سام، وهو مراجعة برامج الجامعة المصرية الناشئة.. فالأمر لا تنهض إلا بالعلم والمعرفة، والجامعة هى نواة العلم والمعرفة، فهى إذن ركيزة النهضة. هذا ما حدث فى أوروبا منذ القرن الخامس عشر.. على أن مصر ممهدة تماماً لاستقبال العلم فى أروقة جامعة حديثة، ففيها أسست أقدم الجامعات فى العالم طراً وأعنى الأزهر الشريف. ودعنا لا نذكر جامعة الإسكندرية ومكتبتها فى العصر البطلمي، بل ولا نذكر ما هو أقدم من ذلك، فجامعة أون المصرية القديمة والتي تسمى الآن عين شمس كانت النموذج الأول فى التاريخ.

طه حسين: سيدي الرئيس.. اسمح لى أن أتوقف عند ما أشرتكم سيادتكم إليه وأعنى جامعة الإسكندرية التى ألحقت بالمكتبة، والتى أسست فى مصر منذ القرن الثالث قبل الميلاد. لأنها كانت أول جامعة فى العالم تقوم على أساس حوار الحضارات.

الشيخ الأزهرى: ولماذا نذهب إلى عصور ما قبل الميلاد والوثنية، ولدينا الجامع الأزهر الذى حمل شحنة العلم والمعرفة ونور الإيمان طوال العصور التى يسمونها الوسطى. وفى حين كانت أوروبا تغط فى سبات عميق. أضاء المسلمون مشاعل الحضارة فى دمشق وبغداد والأندلس وتوسطها جميعاً الجامع الأزهر فى القاهرة وتحاور الشرق والغرب فى أروقة الأزهر.

رئيس الجلسة: دعونا لا ندخل فى حوار جانبي يشغلنا عن الهدف الرئيسى لإجتماعنا. نحن هنا لنواصل الحديث عن الأسس العامة للعمل فى كليات الجامعة المصرية الناشئة (لحظة توقف) والآن جاء دور كلية الآداب.

ناليئو: (بنكة الخواجات) هذا صحيح بإسادة الرئيس، وبالنسبة لكلية الآداب، فإن

أهم شئ هو اللغات، فلابد من تدعيم قسم اللغة الإنجليزية والفرنسية والإيطالية واللغة العربية أيضاً.

ليتمان: (بلغة الخواجات) اللغات الأوروبية والشرقية مهمة جداً بالطبع، ولكن قسم التاريخ والجغرافيا والعلوم الاجتماعية، بما في ذلك الفلسفة، كل تلك الأقسام لا تقل أهمية.

الشيخ الأزهرى: وكيف تنشأ كلية لآداب في مصر بدون قسم للحضارة الإسلامية يعنى بالفتوحات الإسلامية والدولة الأموية والعباسية.. وحضارة الأندلس.. والدولة العثمانية.

ليتمان: هذا كله يدخل في قسم التاريخ، الذى يتضمن أيضاً التاريخ المصرى القديم.

طه حسين: حسن.. حسن.. هذه كلها علوم مهمة.. ولكننى قبل كل شئ أقترح إنشاء قسم للغات الأوروبية القديمة أى اليونانية واللاتينية.

ناليو: يونانى ولاتينى ! هل فهمتهم اللغات الأوروبية الحديثة أولاً، حتى تفكروا فى القديمة ؟... لا ... لا.. أنا أعترض.

طه حسين: ولكنك يا بروفيسور تعرف أن أفضل وسيلة لفهم اللغات الأوروبية الحديثة هو البدء بأصولها القديمة. ولماذا تستكثرون علينا دراسة الأصول ؟

الشيخ الأزهرى: (وهو يرق المنضدة بقبضة يده) سيادة الرئيس.. أرجو أن تحذفوا هذه الشطحات من مضبطة الجلسة (يلفت إلى كاتب الجلسة).. فلا موقع له هنا.. نحن نريد كلية آداب تخدم تراثنا القومى العربى والإسلامى.

طه حسين: قسم اللغات الأوروبية القديمة يمولنا ستخدم التراث العربى الإسلامى أكثر من أى قسم آخر.. وأنت تعرف يامولاتنا أن بيت الحكمة فى بغداد أنشئ لترجمة عيون التراث اليونانى إلى العربية. وأن هذا المنجز انتقل إلى الأندلس وترجم إلى اللاتينية.. وعليه قامت أسس النهضة

الأوروبية الحديثة.

الشيخ الأزهرى: إذن فلأبد من تحديد الهدف من هذه الدراسات وهو خدمة التراث العربى الإسلامى.

طه حسين: بل لابد من أن يكون هذا هو المبدأ العام فى عمل كلية الآداب برمتها، أى توظيف جميع العلوم والمعارف فيها لخدمة التراث القومى.

نالتو: ومع ذلك فأنا أعترض.. أنا أرى التركيز فى المرحلة الراهنة على اللغة الإنجليزية والفرنسية والاهتمام بروائع الأدب الأوروبى الحديث: دانتى وشكسبير ومولير وكورنى ورأسين مثلاً و... .

طه حسين: يا بروفيسور.. أنت أول من يعلن أن هذا الأدب الأوروبى الحديث لا يمكن فهمه فهماً علمياً صحيحاً بدون العودة للأصول، أى دراسة هوميروس وسوفوكليس ويوربيديس وسينكا.. أليس كذلك ؟

نالتو: هذا يحدث فى الجامعات الأوروبية، التى أنشئت منذ مئات السنين.. ولكن هنا نحن نتحدث عن كلية حديثة (بإستخفاف) إنشئت فى أ ب.

طه حسين: ولابد من البداية الصحيحة، ثم إن هذه الحضارة اليونانية واللاتينية دخلت تاريخنا وأصبحت جزء من تراثنا بفضل إسهام مصر فى صنع هذا التراث وحفظه، والدليل الأكبر على ذلك مكتبة الإسكندرية.

ليتمان: مكتبة الإسكندرية ! من فى مصر يعرف مكتبة الإسكندرية ؟

طه حسين: إذا كان المصريون الآن لا يعرفون، فنحن ننشئ الجامعة لكى ننشر هذه المعرفة. لا تنس أن مساهمة المستأنى نشر ترجمة شعرية لإلياذة هوميروس عام ١٩٠٤، وكان قد قصى عشرين سنة يدرس الإيطالية واليونانية والفرنسية، ولا تنس أن شعراءنا وأدباءنا يتقنون بالإسهام المصرى فى الحضارة العالمية وبالذات فى الحضارة اليونانية الرومانية.

ليتمان: (ضاحكاً)، وهل تحلم يا طه حسين أن تعيدوا بنساء مكتبة الإسكندرية! هذا حلم ظريف جداً (يستمر فى الضحك).

طه حسين: (متجاءلاً كلامه) إن الحفريات التى تقوم بها البعثات الأجنبية فى البهنسا تدعونا للاهتمام بهذا التراث. فليس من المعقول أن يكون اسم البهنسا أو أوكسيرنخوس كما يعرفونه فى الخارج مجلساً فى كل أنحاء العالم.. ولا يعرفه المصريون .

ناليئو: الفضل فى ذلك لعلماء كبار فى أوروبا.. اكتشفوا برديات مهمة مثل "نظام الآتينيين" لأرسطو ومسرحيات مناندروس، لقد قاموا بفك طلاسم هذه البرديات وحققوها ونشروها (لحظة توقف) ضيعوا عمرهم فى البحث وأدوا خدمة جليلة للعلم وللإنسانية.

طه حسين: بكل تأكيد.. ولكن لماذا لا يسهم المصريون فى هذا الإنجاز الحضارى وأرضهم هى التى حفظت هذا التراث. وهذه البرديات التى تمسأ متاحف العالم.. كلها مصرية المنبع. والمصريون هم الأولى بدراستها ونشوها.

ناليئو: ولكن لا يوجد أحد فى مصر يعرف اللغة اليونانية القديمة.

طه حسين: ولا بد أن نبدأ الآن (مامناً) أنا أحلم بهذه البرديات التى تمسأ متاحف العالم، وتلك التى لم تكتشف بعد.. أن تتجمع جميعاً فى مكان واحد على أرض مصر، ويسهر عليها المصريون يدرسون ويترجمون ويقدمون للعالم آيات من فضل مصر على حضارة العالم.. أحلم بمكتبة ضخمة هى الأولى وهى الأعظم فى المنطقة.. تسطع شمسها على مياه البحر المتوسط فترتوى بنور العلم المصرى وتشره فى أرجاء العالم، تسرى به الأرضى القاحلة.. ونقول للأوروبيين. اسهلوا من هذا العلم كما سهل أجدادكم الأقدمون.

رئيس الجلسة: حسن.. حسن.. دعونا نصل إلى السفيد (لحظة توقف) الأقسام التى اتفقت عليها تشكل لجنة لكل منها لمراجعة اللانحة الداخلية على أن تضع توصيفاً للمقررات ونظام الدراسة ومتطلباتها.. أما القسم الذى مازلتم تختلفون عليه حتى الآن: قسم اللغات الأوروبية القديمة، فالأمر يحتاج

إلى مزيد من الحوار والدرس. وفي الجلسة القادمة أرجو أن يقدم لنا طه حسين مذكرة تفصيلية حول هذا القسم ومقترحاته بالمواد التي تدرس فيه وأسماء الأساتذة الذين يمكن أن نستجليهم من بريطانيا أو فرنسا للقيام بالتدريس.. على أن نخصص الجلسة القادمة كلها لهذا الموضوع. والآن نحن جميعاً مدعوون لحضور محاضرة في الجمعية الملكية الجغرافية نظمها طه حسين، تفضلوا.

(يتجهون جميعاً للجلوس في الصالة ماعدا طه حسين وناليتو وليتمان. وعلى خشبة المسرح تظل المنضدة الكبيرة ويجلس عليها الآن طه حسين وسط الأساتذة الأجبيين. ويتوسط المنضدة مكبر صوت. ويمكن اعتبار صالة المنفرجين قاعة الدوات. ويمكن زرع بعض الممثلين ممن سيتدخلون في الحوار في صفوف الجمهور الذي يضم بعض السيدات المصريات المحجبات وبعض السيدات الأجنبية السافرات).

طه حسين: أيها السيدات والسادة في البداية باسمكم لا معنى إلا أن أتوجه بالشكر الجزيل إلى الجمعية الملكية الجغرافية، التي تستضيف ندوتنا هذه فتضيف مكرمة جديدة إلى ما سبق أن قدمته للثقافة المصرية الناهضة. أرحب بضيفينا العزيزين الأستاذ ناليتو والأستاذ ليتمان (مشيراً إليهما)، فهما من أعلام الدراسات الحضارية واللغوية وهما أيضاً من المستشرقين المرموقين. فهما يدرسان اللغة العربية وآدابها ويتحدثان اللغة العربية الفصحى وإدارجة، فلا يتعثران ولا يتلعثمسان. وسحدثانا اليوم عن علم جديد ظهر في أوروبا منذ سنوات قليلة هو البابيرولوجيا أي علم البردى. وسأترك لهما مهمة التعريف بهذا العلم ومجالاته وإفاق المستقبل أمامه. وليتناهدل الأستاذ ليتمان.

ليتمان: الشكر الجزيل للأستاذ طه حسين أن أتاح لنا هذه الفرصة الثمينة.. والشكر الجزيل أيضاً لكم أنتم جميعاً (مشيراً إلى الصالة) وعندي اقتراح بسيط أرجو أن يوافقني عليه الأستاذ طه حسين وزميلى وصديقى الأستاذ ناليتو.. وهو أن يكون هذا اللقاء حواراً مفتوحاً.. لامحاضرة.. هل

توافقون.

(تصفيق حاد في الصالة)

ناليٲو : حسنآ.. وأنا أوافق تمامًا.

طه حسين: أما أنا فأرحب.. فهذه هى الطريقة المسفراطية المثلى فى السدرس، واسمحوا لى أن أبدأ بالسؤال (تصفيق).

ما المقصود بتعبير "علم البردى" ؟ وما علاقته بمصر ؟

ليتمان: علم البردى نسبة إلى نبات البردى الذى كان يصنع منه الورق. وبفضل هذا الورق عرف المصريون القدامى الكتابة، بل هم الذين علموا العالم هذا الفن.. وأصبحت مصر بمثابة كتاب مفتوح سجل فيه كل تساريخ الدنيا.

ناليٲو: وهذا النبات لا ينمو إلا فى مصر، ولم تصاننا أوراق بردى مكتوبة من أى مكان فى العالم سوى مصر.. هنالك استثناءان صغيران يثبٲان القاعدة.. فعر على برديات قليلة فى فلسطين وجنوب إيطاليا.. ولكنها أقل من قطرة فى بحر، ولذلك عندما نقول بردى فنحن نعنى مصر .

طه حسين: المفروض إذن أنه علم مصرى. وأن المعاهد المتخصصة فيه ينبغي أن تكون مصرية أليس كذلك ؟

ناليٲو: هذا مستحيل.

ليتمان: نعم هذا فى الوقت الحاضر مستحيل.. لأن كل البرديات المكتشفة توجد الآن فى المتاحف الأوروبية، لا توجد فى مصر بردية واحدة مما تم اكتشافه بالصدفة أو عن طريق الحفريات.

ناليٲو: وأهم من هذا أنه لا يوجد فى مصر من يفسر أون اليونانية، ومعظم البردى المكتشف مكتوب بهذه اللغة.

مستمع من الصالة (١): (بانفعال) ولكن كيف خرجت هذه البرديات من مصر ؟

ليتمان: لا داعى للانعغال.. الناس هنا فى البداية كانوا يكتشفون البردى بالصدفة فى



"الزلع" المدفونة في أكوام السباح عند حافة الصحراء.. وكانوا يستخدمون هذه البرديات في صنع الشاي وفي التدفئة جنب الشادوف في الغيط أثناء ليالي الشتاء قارسة البرد. بعد كده الخواجات بدأوا يشتروا هذه البرديات بشلن وببريزة ويسافروا بها للخارج.. (ضحك في المانة) الحكاية بسيطة وما تزعلش لأن الناس هنا ماكانتش عارفة قيمة البردى.

مستمعة محجبة: بروفيسور ليمان... هل في أوراق البردى هذه... شين يهم الأسرة؟

ليمان: بالطبع.. عثر على أوراق بردى تتحدث عن الزواج.. بل عثرنا على عقود زواج وطلاق وهناك برديات تتحدث عن الحمل والولادة... وأخرى تحمل دروساً في الحساب والموسيقى.. لدينا الآن باختصار صورة كاملة عن الحياة الأسرية والحياة الاجتماعية والاقتصادية في مصر.

طه حسين: سيداتي سادتي أنا أثني على هذا السؤال الأخير وعلى إجابة الأستاذ ليمان فلقد جننا هنا لنسمع ونتعلم.. والمهم أن نخطط للمستقبل. ولقد علمنا الآن أن علم البردى مصرى مائة في المائة من حيث المصدر.. أما أن يصبح هذا العلم مصرياً حقيقة.. فأعتقد أن المشوار طويل جداً.. بل ولم يبدأ بعد.

مستمع (٢): ولكن نريد أن نعرف كيف سافرت البرديات للخارج ؟

ناليو: (متدخلاً) دعونا ننسى الماضي، كل شئ الآن سيتم بالاتفاق مع مصلحة الآثار المصرية. ولقد تم الاتفاق فعلاً بينها وبين البعثات الأثرية الأجنبية على اقتسام المكتشفات، مصلحة الآثار المصرية تأخذ النص والبعثات الأجنبية النص (موضحاً المعنى بيديه) أظن كده فيه عدالة ؟

وبالذات هناك احتمالات قوية لكشوف بردية هائلة في أوكسيرنخوس ومن الآن فصاعداً سيمتلئ المتحف المصري الأثري بالبرديات (تحظة توقف) ميسوطين ؟!

مستمع (٢): لكن أين هي أوكسيرنخوس ؟

ليمان: البهنسا

مستمع (٢): البهتسا.. مركز مغاعة مديرية المنيا ؟!

نالتو: بالضبط.

مستمع (٢): (صارخا) دى بلدنا، أنا مولود هناك.. بلدنا فيها كل ده ومأ تعرفش  
(يضرب كفا بكف). أنا لازم أرجع بلدنا. (يخرج من الصالة)

(الستار)

## اللوحة الثانية آكلو البـردى



(قهوة البهنسا وتسمى 'قهوة معزة' على الجانب الأيمن من المسرح. وهي قهوة بدائية بسها عدد من الكراسى الخشبية والترابيزات. وصاحب القهوة يستخدم الكانون في صنع الشاي والقهوة.. على الجانب الأيسر تبدو خيمة بعثة الاستكشافات والحفريات الإنجليزية.. وأمام الخيمة منضدة كبيرة عليها بعض الكراسى المريحة وحول المنضدة وفوقها تنتشر زلع البردياتتىر المكتشفة من قبل عن طريق الصدفة.. فى عمق المسرح تبدو أكوام السباح وتلال الرمال)..

رجب: إصطبحنا واصطبح الملك لله.. بسم الله الرحمن الرحيم.. ربنا يجعله خير النهاردة (نحظة توقف) واد يامعزة.. واد يامعزة.. إنت فين ياواد.. (يدخل معزة).

معزة: صباح الخير.. بابا الحاج رجب.. ياسيد الرجالة.. نهارنا فل إن شاء الله رجب: فل إيه وياسمين إيه ياواد.. ياللا جهز القهوة.. بسرعة.. دول بيقلولوا النهاردة هاجينا ناس كثير من البندر.. ياللا بسرعة.

معزة: حاضر.. مسافة الهوا

رجب: مسافة الهوا وإنت واقف (يتحرك معزة إلى داخل القهوة ويمسك به رجب) يس شوف الأول لو حاجة ناقصة نلحق نجيبها.. شاي.. بن.. ياتسون.. قرفة.. سحلب..

معزة: كل ده بابا الحاج !! ليه هو مدير المديرية جاي.

رجب: يا إبنى بقولك البلد نازلها ناس كتير.. كتير قوى.. من البندر ومن الفلاحين.

معزة: طب والحاجات دى كلها هنجيبها منين بابا الحاج.

رجب: يا إبنى الحمير فى البلد كتير.. نبعث حمار ويركبه أى واحد يجيب كل حاجة ويرجع هوا.. قبل مايوصلوا الناس النلى جايين.

معزة: بس إنت عرفت منين إنى ناس كتير جايين ؟

رجب: (يجره) شايف إلتى هناك ده (يشير إلى الخيمة فسى الجانب الأيسر) .

معزة: وهى الخيمة اللى قالت لك.

رجب: يادى الخيبة، هو فيه خيمة بتتكلم.

معزة: ياسلام ! ده كل حاجة بتتكلم. طب ده أنا كنت مرة سهران.. و

رجب: (يمسك بتلابيبه) أنى موش عايز رعى عالصبح.. إحنا مستعجلين.

معزة: بس أنا عايز أفهم عرفت منين إنى ناس كتيرة جاية.

رجب: العصفورة قالت لى.

معزة: الله.. الله.. يبقى العصافير بتتكلم كمان..

رجب: شوف من النهاردة ورايح كل حاجة هتتكلم.. الخيمة هتتكلم.. أكوام

السيخ المعفنة دى هتتكلم.. الزلع اللى مليانة ورق قديم ومقطع فثافيت،

الزلع دى هتتكلم.

معزة: وهتتكلم بأته لغة بابا الحجاج.

رجب: يا إبنى ده الأرض بتتكلم عربى.. والننى عربى.. كل حاجة بالعربى.

معزة: بس لو أعرف.. جيت الكلام ده كله منين.. مين اللى قالك ؟

رجب: إمبراح ماشوقتش الحصان إلتى جاي من البندر وشايل واحد عسكرى

أحمو.

معزة: قصدك عسكرى إنجليزى.

رجب: صح.. أدبك فهمت.. أهو ده الحصان.. والعسكرى الأحمر.. همما اللى قالوا

للعمة سليم البهنساوى، وخلوه إمبراح ينصب الخيمة دى.

معزة: برضه موش فاهم.

رجب: موش مهم تفهم كل حاجة دلوقت، اعرف بس إن بلدنا هتبقى حاجة

كبيرة قوى فى التاريخ.

معزة: يعنى إيه التاريخ ؟

رجب: يعنى هيكتبوها فى الجغرافيا وتحسبها شرطة.

معزة: تاريخ وجغرافيا وشرطة ؟ دى حاجات جديدة قوى وتخوف.

رجب: يابنى حد جاب سيرة الشرطة، أنا بقول تحتها شرطة.. شرطة (لحظة توقف) إسمع بقية.. ماتوديناش فى داهية.. أدخل إنست وجهاز كل حاجة فى القهوة.. واشطفها كويس.. ورص الكبايات والفناجين.. والصواني والنراجيل.. كل حاجة.. فاهم.. كل حاجة (لحظة توقف) وأنا رايح أشوف حمار أبعته شايل حد من نواحيننا يجيب كل طلباتنا من البندر.. وصيتك بامعزة كل حاجة فى القهوة.

(يدخل معزة القهوة ويهم رجب بالانصراف ولكنه، يلمح العمدة سليم البهنساوى قائماً).

سليم البهنساوى: السلام عليكم.

رجب: وعليكم السلام ورحمة الله وبركاته يا حضرة العمدة.. يا أهلاً وسهلاً، إتفضل ياسعادة العمدة. (يجر كرسى ليجلس العمدة عليه ويجلس على كرسى آخر بجانبه).

سليم البهنساوى: الحقيقة أنا موش عارف أعمل إيه..؟ مرة واحدة اتقلببت علينا الدنيا.. قال إيه.. البهنسا.. حطوها على خريطة الآثار والسياحة.

رجب: ما يحطوها ياساعدة.. ودى فيه حاجة دى.. روق بالك.. إشرب القهوة الأول، ويعدين تكمل.. (يرفع صوته) واد يامعزة.. هات قهوة العمدة يا ولد بسرعة... هوا.. (مخاطباً العمدة) يعنى إيه خريطة الآثار والسياحة؟! موش ورقة ويحطوا البلد على الورقة دى أهو كله ورق، ما تقلقش يلعمة!

سليم البهنساوى: (يكمل حديثه) يارجب إنت موش عارف إيه المصيبة إالى حطت

على دماغى.. ده بس من إمبارح جات الآوامر مع العسكرى الأحمر..  
وفى يومها اتنصبت خيمة أهه.. يعنى معسكر.. وطالبين حوالى ميتين  
عامل يشقتلوا معهم.. وطالبين حاجات كتيرة.. وزمانهم المسنولين  
والخواجات جابين النهاردة ولا بكره.. البلد هاتبقى زابطة وأنا ما حبش  
الزبطة.. والسياسة هتكثر فى البلد وإنت عارف المشاكل اللي ورا  
السياسة (يخرج معزة بالقهوة).

معزة: صباح الخير سعادة العمدة.. قهوة مظبوط.. بسن وحياسة النبى خريطة  
الآثار والسياسة يعنى إيه..؟ هم ها بخرطونا زى الملوخية ولا زى قشر  
البطيخ؟

رجب: خش شوف شغلك يامعزة.. سيبنى أنا أتكلم مع العمدة.

معزة: هو حرام لما أستفسر.. ماهو قهوتنا عايزة تتطور علشان اللي بيحصل ده..

سليم البهناوى: وعايز تعمل إيه فى القهوة يامعزة؟

معزة: (مشيراً هنا وهناك) لازم نجيب كراسى كتير.. ولا أحسن نبنى مصاطب، دى  
مصر بلد المصاطب من أيام الفراعنة.. وبعدين الخواجات بيحبوا العيش  
البلدى السخن.. نبنى فرن هنا وخبازه تقعد تخبز وهمه بقسه ياكلوا  
ويزأططوا.. والكانون اللي إحنا بنستخدمه.. لازم يكبر.. أو نبنى كانونين  
ثلاثة... فى الركن.. ده كده تبقى قهوة سياحى.. لو كس .. و....

رجب: يامعزة قلت لك شوف شغلك وسيبنى أنا أتكلم مع حضرة العمدة (ينصرف  
معزة) وناوى تعمل إيه يساعده؟

سليم البهناوى: دى آوامر عليا.. من مدير المديرية.. ومأمور المركز...  
والخواجات همه اللي هايعملوا كل حاجة.. بس البلد نفسها لازم تبقى  
جاهزة.. يعنى لازم أشوف لهم العمال اللي هيشقتلوا معهم ويكونوا ناس  
مأمونين، ولازم الأمن يكون مستتب.

رجب: والعمال دول.. هيعملوا إيه بالضبط.



سليم البهنساوى: قال إيه هيحفسروا فى الأرض..

رجب: ليه..؟ هى بلدنا فيها ذهب ولا فضة.. ولا بسترول.. الحاجات اللي بنسمع عليها دى ؟

سليم البهنساوى: لا.. بيقلولوا بلدنا فيها الأغلى من الذهب والفضة والبسترول.. فيها حضارة

رجب: بلدنا فيها كل ده واحنا مسوش عارفين ؟

سليم البهنساوى: قال إيه فتافيت الورق القديم اللي فى الزلج ده... أغلى من الذهب.

رجب: لازم هيسبحوه والصاغة تعمل منه ذهب... دحنا بنولع الكاتون والقرن منه (لحظة توقف) آه عشان كده الشاى اللي بنعمله عليه... طعمه حلو... زى العسل، والعيش اللي بنخبزه فى القرن ريحته حلو. ومليان حضارة اللي بيقلولوا عليها دى. ولوته زى الذهب... دا احنا بناكل ونشرب حضارة وذهب واحنا مش عارفين.

(تدخل خضرة زوجة رجب وعلى رأسها طبق عريض وكبير مصنوع من سف النخيل)

خضرة: تصبحوا بالخير... تصبح بالخير ياحضرة العمدة، تصبحوا بالخير يااولاد... (تتجه إلى ركن أمام القهوة وتضع الطبق على الأرض) تعال ياحضرة العمدة.. تعالوا يااولاد أنسا جيت لكم الفطار.

رجب: اتفضل ياحضرة العمدة.. هاتفطرينا إيه ياخضرة.. من إيدك الحلوة

خضرة: اتفضلوا... دا خير ربنا كثير.. (ترفع صوتها) تعال يامعزة إفطر معهم...

(يتعلق الجميع حول الطبق ويجلسون)

سليم البهنساوى: الله.. الله.. زبدة وجبنة صابحة وعسل كمان...

خضرة: (تمسك فى يدها قدر صغير يشبه الزلعة)... ده أنا كمان عملتكم عدس فى القرن.. الزلعة دى بايئة فى القرن من امبارح.. ومولعة عليها بالبردى.. وجبت لكم بصل أخضر معاد.

معزة: الله أكبر.. الله أكبر.. ده أكل المصريين كله حضارة اللي بيقلوا عليها اليومين دول.

خضرة: (ملتفتة إلى خيمة البعثة الأثرية) ياخضرة العمدة.. إيه الخيمة اللي هناك دي الله.. إيه اللي بيجرى فى البلد يساعمة. إحنا هيحطولنا معسكر فى بلدنا ؟

سليم البهناوى: (وقد امتلأ فمه بالطعام ويمسك بيده البصل الأخضر) ياخضرة إحنا بلدنا خلاص دخلت التاريخ والجغرافيا والسياحة، وبيقولوا إن إحنا عايشين فوق كنوز موش عارفين قيمتها.

خضرة: وهم عرفوها إزاي ؟

سليم البهناوى: عشان هم دخلوا التاريخ قبلنا من زمان .

خضرة: واحنا مستنيين إيه ؟ ما ندخل معهم.

رجب : إيه ياخضرة.. هو دخول التاريخ سهل، هو انت هتخطى العتبة تاتنا تاتنا ؟

خضرة : ياخويا نشوفهم دخلوا التاريخ إزاي وندخل زيهم، ويمكن أحسن منهم عشان إحنا هنتعلم منهم، ولو غلطوا موش هتغلط زيهم.

معزة: سلم فمك ياست خضرة.. كلامك حلو زى أكلك.. أنا عمري ماكلت عدس بالحلاوة دي..

خضرة: البركة فى البردى هو اللي بيدى طعم حلو للأكل.. ولعته هادية ويبطلع ريحة معطرة.. وناره بتتور الفرن والمكان كله.

سليم البهناوى: شوفى ياخضرة .. أنا متهاى لى إنهم هيمنعوا حرق البردى من هنا ورايح.

خضرة: يا مصيبتى.. هو كل ما تحلو حاجة فى عينينا يمنعوها ؟

سليم البهناوى: أصل الذهب اللي بيكلموا عليه، والكنوز دي.. قصدهم السبردى اللي بتلاقه فى الزلج.

خضرة : جدى كان بيحكى لى.. إن الناس كانت بدور على الكنوز فى أكوام السبخ (مشيرة إليها) فلقوا زلج مليانة عملات فضة وذهب .. وراحوا يصرفوها فى البندر قبضوا عليهم.. وقالوا لهم والعمله دي متمشيش دلوقت.. وخدوا منهم الزلعة

.....

بقلوسها القديمة ... ولم جدى لقي زلعة مليانة ورق بردى .. حسبها قلوس ..  
وقالوا لا ... دى موش قلوس .. وابتدنا من ساعتها نستعملها فى الكاتون  
والقرن.

سنيم البهنساوى: عشان كدة أنا موش عارف هم بيقولوا على البرديات دى كنوز  
ودهب ليه ..

رجب: المهم اللى عنده زلع بردى مفروض يحافظ عليها .. ويخفيها .. لما نشوف إيه  
اللى يحصل، واد يامعزة خبى البردى اللى هنا ..

معزة: أمال هنولع الكاتون إزاي ؟

رجب: عندك الحطب والبوص فى كل مكان.

خضرة : خلاص .. وأنا من ناحيتى موش مطلع زلع البردى اللى عندنا فى البيت.

(الستار)



اللوحة الثالثة

تواصل



(المشهد السابق مع إضافة تغييرات جديدة، فالأحداث تجري مساءً ... القهوة مضاعة بلمبات الجاز المتدلية على الحوائط وعلى جذوع النخل أو ما شابه ذلك .. أمام القهوة فرن بلدى .. تجلس أمامه إحدى الفلاحات التسي تعجن العجين وتخبز العيش البلدى .. النار تشتعل فى الكانون وعليه إناء كبير جدا لعمل الشاي .. أدوات الشاي حول الكانون .. القهوة عامرة بالرواد .. على الجانب الآخر تبدو خيمة البعثة الأثرية مضاعة بكلوب .. على المنضدة يجلس العالمان الإنجليزيان جرنفل وهنت .. وكلاهما يضع نظارة سمكة العنسات على عينيه .. مجلدات ضخمة ودوسيهات متناثرة على المنضدة .. يرتدى جرنفل شورت كاكى وفانيلة حمراء وبرنيطة ذهبية اللون ويرتدى هنت شورت أزرق وفانيلة حمراء وبرنيطة باللون الأحمر والأبيض على منضدة صغيرة تجلس هيلين سكرتيرة البعثة ، ويدهما كاميرا تصور بهما البرديات ، وعلى المنضدة أمامها آلة طابعة صغيرة).

رجب: يامسا التماسى يا عمدة.. إحنا قهوتنا منورة بك وبالناس الجدعان أهل البهنسا.

سليم البهنساوى: ربنا يسترها معانسا يارجب والبلد كلتها تقف وقفة كويسة عثمان نظهر بمظهر كويس أمام المسئولين وأمام الخواجات... (تلفت حوله) فين السيسى.

السيسى: (على كنفه الأيسر بندقية) حاضر يا فندم.. تمام ..

سليم البهنساوى: إسمع ياسيسى خللى بسالك من الخواجات.. دول أمانة فى رقبنا.. لو الهوا مس شعرة واحدة بس من راسهم هنروح فى داهية، وفضيحتنا تبقى بجلاجل.. هيقولوا البهنسا بتسهل ضيوفها.. أما لو حد منهم جرت له حاجة يبقى ياداهية دق.. يبقى على الدنيا السلام، ضيوف بلدنا لازم نحطهم فى عينينا. دول ضيوفتنا.

السيسى: يا حضرة العمدة أنا وكل الغفر وكل رجالة البلد نحطهم فى عينينا.. ضيوف البهنسا يبقوا ضيوف مصر كلها.. البلد كلها فرحانة بهم. وألست الشقرا اللي معاهم دى زى لهطة الفشطة... والناس كلها فرحانة بها... ياسلام يا ولاد.

سليم البهنساوى: بطل رعى ياسيسى واسمع الكلام.

رجب: (متدخلا) يا عمدة ما تشغلش بالك الصغير فسسى البلد دى قيسل الكبير عارف واجبات الضيافة.. والناس دول على راسنا من فوق.. وبعدين دول جايين لمصلحة بلدنا.. ده البهنسا هترسم على الخرطة ومن تحتها شرطة. والنبي يا عمدة.. إحنا عايزين نستقبلهم الليلة هنا فى القهوة بفرحة.. قصدى يعنى نعمل شوية فرشة.. وأنا مجهز كل حاجة.. الخبازة أدبك شايك شغالة بتخيز لهم عيش بلدى سخن.. وعلى الطلاق.. لأدبجهم الليلة جدى بحاله.. علشان خاطر جناب العمدة وضيوف بلدنا، وبعد إذنك يا عمدة نبتدى من دلوقت.

سليم البهنساوى: أنا بقول نستنته لما يججوا.. ولا رأيك إيه ؟

رجب: أنا رأى نبتدى دلوقتى .. وهمه لما يشوفوا الفرحة والزينة هينسطوا وييجوا يسهروا معانا.. وبعدين دانا جايب مغنواى صبييت.. يا عالم ياهووه!.. خلىنا نفرح يا عمدة دقى يامزيكا.

(يبدأ المغنواى فى الغناء ، ثم يهبط بقية الحاضرين خطوة خطوة بالإشتراك معهم فى الغناء.. ويصل جرنفل وهنت وهلين وينخرطون فى الغناء والرقص مع أهل البلد)

المغنواى: لا تسع إلى فعل الخطأ

لا تقابل الشر بمثله

اجتنب جرائم القتل

واحذر الشحناء

لا تقرب البغضاء

ستعاني بعض الوقت

ولكنك لن تتدم على ذلك قط

اعزف لى لحن أغنيتى على الفلوت

وعندما أموت ضع فوق رأسى مزمسارا

وعند قدمى شيثارة



واعزف لى لحن أغنيتى على الفلوت  
 قل لى منذ الذى بلغ منتهى الشراء  
 أو غاية الفقر ؟  
 من بلغ حد الشبع من جمع الذهب ؟  
 فمن يملك المال يطالب مالا أكثـر  
 والغنى قليل الحظ يتساوى فى العذاب مع الفقير  
 اعزف لى لحن أغنيتى على الفلوت  
 عندما تقع عينك على رجل ميست  
 أو عندما تمر بالقبور الصامتة  
 فأنت تنظر فى مرآة الدنيا  
 كم كانت آمال ذلك الميت عريضة !  
 حياتنا دين علينا.. وصاحب الدين  
 جبار قاسى  
 يأتى إلينا ليسترد حقوقه  
 ولا يقيه أن تسدد الديون بالدموع  
 اعزف لحن أغنيتى على الفلوت

جرتفل: (ياخذ هنت جانباً ويتهامسان . ويعلو صوتهما غير المفهوم بالنسبة للآخرين ولكن يبدو  
 أنهما على خلاف حاد حول هذه الأغنية)

رجب: (الحق يا عمدة دول باين عليهم هيتخانقوا بسبب الغنوة النكد اللسى لفحننا  
 بها المغنواى العجيب ده.

سليم البهنساوى: خليهـم مع بعض مائشاش دعوة

رجب: بس لازم نتكلم معهم.. لكن هتكلم إزاي همسه بيفسهموا لغتنا ؟

سليم البهنساوى: بيّفهموا يارجب لأن دول من اللسى بيقولوا عليهم مشرقين.

رجب: يعنى إيه مشرقين ؟

جرنفل: (مقتربا) نحن مستشرقين يعنى بندرس عربى.. وينكلم عربى .

هنت: أى نعم.. ونحن فاهمين كل حاجة.

جرنفل: أنا وزميلي هنت كنا بنتناقش حوالين الأغنية اللذيذة دى.. أنا متسهيا لى (يدخل مع هنت فى حوار حاد بالإنجليزية لا يفهمه الآخرون).

رجب: تانى.. هيقبلوها نكد

جرنفل: لا.. لا.. ماتخافوش ده احنا أصحاب وزملاء (لحظة توقف) أنا بقول الأغنية دى أغنية شعبية إكتشفت بالصدفة فى البهنسا على برديسة وترجع للقرن الأول الميلادى.. يعنى عمرها حوالى ألفين سنة.

هنت: أنا موش موافق.

جرنفل: أنا عندى النص اليونانى.. وهنقراه مع بعض ونشوف مين عنده حق.

هيلين: (بلكنة مشرقين واضحة) موش مهم هى فى السبردى ولا فى الزفت.. المهم غنوة حلوة وموسيقى حلوة.. خلونا نتمتع شوية.. رقصنى بساجدع (يعاد جزء من الموسيقى مع رقصتها)

رجب: حضرة العمدة أنا رأى نغير الجو ده ونعمل شوية فرفشة خلىنا فى الجو مع الست العسل دى (لحظة توقف).. سلاش مشاكل من أول ليلة.. إسمع يامغنواى إحنا عايزين غنوة فرايحى.. مافيهاتش نكد.. إنت عاملى مثقف (يمسك عصاه ويرقص).. رقص وغنا.. دقى يامزيكا... ياللا... وجبأ.

المغنواى: ياباتى الهرم، سامصرى سامحترم

يامعلم الدنيا الزراعة والكتابة

وصنعة الورق والقلم

وسبقت الزمن

وصليت فى الكرنك

والشمس نورت

وقفت تشاهد صنعتك

دخلت عليك معبدك

دخلت عليك خلوتك

وإن كنت ناسى

أبو سمبل يفكرك

يقولك

يابانى الهرم يامصر يامحترم

إمسك القلم

وارسم العلم

خريطة نور وفن وهندسة

من أسوان والعريش والبهنا

عايزين ترجع الأيام دينة

ونليس بلدنا عروسة

ونزفها ... لمين ؟

لك إنت يامصرى يامحترم

يابانى الهرم ..

الهرمساوى: (يدخل متدفعاً وعليه آثار معركة ضارية) يااحضرة العمدة إحقنى يااحضرة

العمدة .. أبوس رجلك يااحضرة العمدة .. أنا ماليش ذنب يااحضرة العمدة.

سليم البهناوى: إيه اللى حصل ؟ إحكى لى بسرعة .. إنطق !..

الهرمساوى: المعيز .. المعيز يااحضرة العمدة

سليم البهناوى: مالها .. إنطق

الهرمساوى: إسرقت .. اتخطفت ..

سليم البهناوى: إحنا بلدنا .. البهنا يحصل فيها الكلام ده .. إزاي ؟

الهرمساوى: كنت بأرعى المعيز .. حدا الجبل وكنت مبسوط .. وسعيد .. والمعيز بتساكل

وبترعى فى خير بلدنا .. وفجأة طلغوا على الحرامية .. تقول ثلاثة، عشرة،

عشرين موش عارف .. لأنهم مرة واحدة نزلوا على ضرب ولمسا وقعت

على الأرض كتفونى وغطوا عنيه .. إثنين عملوا كدة والباقيين خدوا المعيز

وهربوا فى الجبل.. ولما بعدوا خالص.. وما عدتش سامع صوت المعيز..  
 فكونى.. وكانوا مغطيين وشهم وهربوا.. وقالوا لى.. روح بيتكم ياشساطر..  
 وروح غنى مع العمدة والخواجات.. ماهى بلدكم بقت بلد خواجات مالمشاش  
 مصلحة بالمعيز المعيز دى يتاعتنا إحنا.. إنتو بتوع الخواجات.

هيلين : (وقد غابت عن الوعى ولا تزال تغنى وترقص)

يامصرى يامحترم

ياباتى الهرم

عايزين نرجع الأيام ديه

ونلبس بلدنا عروسة

ونزفها.. نزفها لك يا مصرى يامحترم

(تسقط على الأرض)

(الستار)

## اللوحة الرابعة رسالة خاصة إليك من آلاف السنين



(فى الصباح الباكر وفى جو صحو وشمس مشرقة. فى عمق المسرح يشاهد الفلاحون وهم يحفرون فى التلال وأكوام السياخ. بين الحين والحين يكشفون عن زلعة يونانية الشكل.. يسلمونها لرئيسهم عبد اللطيف الذى بدوره يذهب بها إلى خيمة جرنفل وهنت الجالسين على منضدة طويلة. يقوم أحد العمال بين الحين والحين بتفريغ عبوة إحدى الزلج أمامهما وهى برديات يتفاوت حجمها فى الطول والعرض.. وكذلك فى حالة سلامتها.. فمنها ما هو سليم ، ومنها ما هو ممزق. ومنها ما هو عبارة عن قطعة صغيرة جداً. جرنفل يحاول تجميع شذرات البرديات جنباً إلى جنب على لوح زجاجى ثم يغطيها بلوح زجاجى آخر . ويحاول بعد ذلك قراءة البرديات. ويسجل هنت كل شئ . أما هيلين فهى منهكة فى تصوير البرديات . وبين الحين والحين تضرب بأصابعها بعض الكلمات على الآلة الكاتبة).

جرنفل: تعرف يا هنت كم هى جميلة هذه المدينة القديمة أوكسيرنخوس التى يسونها الآن البهنسا !

هنت: وما هو الجمال الذى تراه فيها.. إنها الآن قرية قذرة، عبارة عن أكوام من السياخ والتلال الرملية... وفلاحين وبهائم وبلهارسيا.. وناموس.

جرنفل: لا يا هنت.. لا.. إن جمال البهنسا فى تاريخها العريق.. فى أمجادها، فى كل ما قدمت للبشرية من خير. إنها صانعة التاريخ.. إنها مخزن بردى.. ومخزن معلومات.. ولا تنسى أن أكل عيشنا.. ورحتنا إلى هنا.. كل ذلك بسبب البهنسا.

هنت: أعرف ، ولكن.. ؟

جرنفل: البهنسا.. هى التى بعد حريق مكتبة الإسكندرية حفظت لنا معظم التراث الأدبى..

هنت: كيف ؟

جرنفل: يقال فى تقارير كبار علماء البردى إن البهنسا هى المركز الأول فى جمع وحفظ البرديات الأدبية و غير الأدبية. يقال إن شذرات من الكتاب المقدس ومؤلفات

هوميروس وباكخيليديس ومناندروس وأرسطو وكاليماخوس موجودة هنا.. هل تعرف أن إحدى البرديات صححت وأكملت الكتاب الرابع والعشرين من "الإلياذة"؟..

هنت: أعرف ذلك من المقررات الدراسية في جامعة أكسفورد، ولكن ماذا تتوقع أن نجد الآن هنا يا جرنفل؟ بعد هذه كل البرديات المهمة لم يبق لنا شيء، أنا بلست.

جرنفل: توقعاتي للاكتشافات في هذا الموقع كثيرة.. منها كوميديات العصر الهيلنستي، ومنها قصائد أخرى لباكخيليديس، وسافو أولى الشعاعرات في العالم.. وغيرها وغيرها.. ولكن هدفي الرئيسي هو...

هنت: (مقاطعا) ماذا؟

جرنفل: المسرحية الساتورية لسوفوكليس "مقتفو الأثر" Aebneutae.

الريس عبد اللطيف: (حاملاً زلعة كبيرة مخاطباً جرنفل وهنت): صباح الخير ياخواجه.. صباح الخير ياخواجه.

جرنفل وهنت (معا): صباح الخير.. ريس عبد اللطيف

الريس عبد اللطيف (واضعاً الزلعة أمام جرنفل): ياساتر.. الزلعة دي ثقيلة قوى.. اتفضل ياخواجه شوف إيه اللي فيها.

(جرنفل يفرغ الزلعة ويحاول قراءة البرديات وهنت يسجل).

جرنفل (ضاحكاً): شوف ياهنت البردية دي طريقة جسدًا، إنها تعود للقرن الثاني الميلادي. وفيها يخاطب أحد الأصدقاء كاهناً من تيبونيس واسمها الآن أم البريجات على الحدود بين مديرية بنى سويف، ومديرية الفيوم تعرف ويقول إيه:

"إني أكتب إليك الآن على عجل حتى لا تغلق، فسأحاول أن أخرجك من المازق. أعلم أن مفتشاً مالياً مسنولاً عن المعابد قد حضر طرفنا وهو ينوى الذهاب إلى ناحيتكم أيضاً. إلحق بسرعة وجهاز حساباتك.. وصلح



فيها وسدد الخانات.. وإذا ما عرفتش تعال بسرعة وأنا هساعدك..  
المفتش خلاص بقى صاحبي.. وكله تمام.. المهم تلحق نفسك وتيجي  
بسرعة.. بسرعة.. فاهم؟

الريس عبد اللطيف: الله...! يعني كانوا بيزوروا في الحسابات؟ وبخافوا من  
المفتشين والمراجعين..؟ الناس بتوع زمان كانوا زينا.. دول كمان باين عليهم  
كانوا عارفين الرشوة.. آمال المفتش هيبقى صاحبه إزاي. دا يعني بيقول كبر  
مخك وكله تمام.

هنت: ريس عبد اللطيف.. بلاش كلام في السياسة.. إنت تساعد مستر جرنفل  
في تفريغ البرديات وبس.

جرنفل: (ضاحكاً) اسمع ياهنت هذه الرسالة الرقيقة من تاسيس إلى سيدها وحبيبها  
أبولونيوس - إسمع ياريس عبد اللطيف (متراجماً).. قصدي يامستر هنت.

"أرجوك ياسيدي إن راق لك أن ترسل لي رسالة، لأننا نموت إن لم نرك  
كل يوم. فياليت لنا أجنحة نظير بها إليك لكي نراك ونحييك.. لا يقلقنا شيء  
في الوجود سوى أننا لا نراك.. كن كريماً ياسيدي وارسل رسالة!..  
رسالة واحدة!"

الريس عبد اللطيف: باعيني.. إيه الحب ده. دول ناس رايقة قوى قوى.. ده أنا  
اللى نفسي حد بيعت لي رسالة ويقول فيها أي حاجة.

جرنفل: إسمع.. إسمع.. شوف الرسالة دي كمان من سيربوس إلى إيسيدورا  
"أريدك أن تعرفي أنه منذ أن تركتيني وأنا أبكي حزيناً، لا أنام طوال الليل،  
وأقضي النهار كله مهموماً. فمنذ أن استحممت معك يوم ١٢ بؤنة لم  
أستحم بعدها مرة واحدة حتى الآن، ولم أدلك جسدي بالزيت حتى يوم ١٢  
هاتور.. لقد أرسلت لي رسائل تحرك الحجر.. ولقد حركتني كلماتك فعلاً..  
وأنا بعث لك كم مرة جوابات كثيرة قوى هتيجي إمتى بقى؟ قول لي  
هتيجي ولا موش هتيجي؟"

الريس عبد اللطيف: ده الرجل هيتجنن ياخواتي.. عقله هيطير على الست اللي بيحبها.. إيسيدورا قال... دا البت مراتي لو سمعت الكلام ده هتقولى روح اتعلم الحب من الزلعه اليوناني يا منيل على عينك ، دا أنا عمرى ما سمعت كلمة حلوة من النوح ده.

هنت: مستر جرنفل حبيبي هي رسائل مهمة طبعاً.. لكن إحنا نعيننا.. لازم نستريح شوية

جرنفل: بس إنت عارف اسم إيسيدورا معناه إيه ؟ (مواصلًا) هدية إيزيس" يعنى الاسم ده لوحده.. برمز لإمتزاج حضارة مصر بالحضارة اليونانية.. وكل ده فى البهنسا.. شفت بقعة البهنسا حلوة إزاي.. ده ريحة أكوام السباح نفسها أجمل من أى عطر فى الدنيا، فيها عبق آلاف السنين من التاريخ والحضارة.

هنت: جميل.. جميل.. بس يامستر جرنفل إنت كمان بساين عليك تعبت. نرتاح شوية.. وبعدين تكمل.

جرنفل: بس لازم تسمع البردية دى هتعجبك دى غنوة من القرن الأول الميلادى وفيها حكمة الزمن كله إسمع  
صوت المغنواتي: ستعاني بعض الوقت  
ولكنك لن تندم على ذلك قط  
اعزف لى لحن أغنيتى على الفلوت  
وعندما أموت ضع فوق رأسى مزماراً  
وعند قدمي قيثارة

جرنفل (يقطع القراءة): شايف يامستر هنت.. الغنوة دى مبوش سمعنا أهل البهنسا بيقولوها.. بيقولوها فى القهوة.. المغنواتسى ده مبوش كان بيغنى ويقول:  
(يكرر الكلمات بمصاحبة اللحن الموسيقى)

جرنفل: وعلشان كدة يامستر هنت أنا وجدتها.

هنت: وجدت إيه ؟

جرتفل: وجدت مسرحية سوفوكليس المفقودة واللى جامعة أكسفورد بحالها هنتهز لو عرفت أتى وجدتها.. مسرحية "مقتفو الأثر" ..

هنت : (بغز من مكانه فرحا ومندهشا) صحيح وجدت البردية ؟ أين هى ؟

جرتفل: لا.. البردية لم أجدها بعد.. ولكن سأجدها حتماً.. لكن قصة سرقة معيز البهنسا.. اللى أعلنوا عنها فى القرية.. أنا شايف إن هى دى القصة.

هنت: أنا موش فاهم حاجة.

جرتفل: موش الأسطورة بتقول إن أبوللو فقد قطعان المعيز.. وإن هرميس هو اللى إكتشفها بعدما ساعده فى ذلك مقتفو الأثر اللى مشوا خطوة خطوة لغاية ما وجدوا القطيع ورجعوا به.. وهرميس تبادل مع أبوللو القطيع والنأى اللى كان اخترعه..

هنت: دى الأسطورة.. نعم.. بس رواية سوفوكليس مانعرفش إنتهت إزاي.. وقصتها إيه بالضبط.

جرتفل: أهو ده اللى وجدته.. أنا شايف إن الناس هنا فى البهنسا حافطين الأساطير والتاريخ.. وعاشين الأساطير والتاريخ.. لكن بالوراثه وموش عارفين إن دى أساطير أو تاريخ .

هنت: موش فاهم ولا حاجة

جرتفل: يعنى.. أنا شايف إن سرقة معيز البهنسا دى تمثيلية بيمارسوها كل سنة.. وإنهم فى النهاية سيحتفلون بالعثور على المعيز.. وده بالضبط صلب الأسطورة.. وأظن إن مسرحية سوفوكليس الساتورية بتقول كده. موتس احنا درسنا فى أكسفورد قصيدة أوفيد الشاعر اللاتينى المنفى فى أسوان.. ووصف فيها معركة بين قريتين وقع فيها موتى والمنتصرين أكلوا لحم الموتى وهاجم أوفيد وحشية المصريين فاكر القصيدة دى ؟

يوسف

عزيمياء

هنت: طبعاً ودى حاجة تنتسى.

جرنفل: العلماء الآن أثبتوا إنها كانت تمثيلية دينية وأوفيد لم يفتن إلى ذلك.

هنت: إنت تعبت قوى يامستر جرنفل (بعد لحظة توقف) لكن ما علينا.. إحنا نستنى وبلاش التفسيرات الأثروبولوجية دى دلوقت لغاية لما تنتهى من مسح كل البرديات وساعتها نتكلم .

جرنفل: (حالمًا) إنت عارف يا هنت أنا نفسى أكل إيه النهاردة.. نفسى أكل أم على.

هنت: (فافزأ من مكانه) يا نهارك إسود ! إنت ناوى تَأْكُل أم على الطباخة ؟

جرنفل: (ضاحكًا) لا.. لا.. إنت ما تعرفش الحلو الللى بيسموه "أم على" ؟

هنت: فيه حلو اسمه "أم على" ؟

جرنفل: عارف لو سمعت الأسطورة اللى بيحكىها المصريين عن نشأة "أم على" عمرك ماتتسى أم على وتدمن أكلها يومياً..

(تدخل أم على الطباخة.. ذات الضحكة الساحرة والوجه الدائرى والعينين الواسعتين.. تضع على ملابسها ميلة بيضاء)

أم على: صباح الخير خواجه جرنفل (تبتسم) صباح الخير خواجه هنت.

جرنفل وهنت: صباح الخير.. صباح الخير يأم على.. أنت بخير ؟

أم على: الحمد لله، تقدرُوا تقولُوا لى تحبُوا تاكلُوا إيه النهاردة.

جرنفل: أم على

أم على: من عينيه، بس أنا بأسأل عن الطبق الرئيسى.. خلاص الحلو عرفناه.

هنت: وأنا عايز ملوخية.

أم على: ملوخية بيايه ؟ بالفراخ، بالأرانب أو.. ؟

جرتفل: بالمعيز...

هنت: فكرة.. أنا موافق

أم على: من عيني ، ولو أننى أول مرة فى حياتى أطبخ ملوخية بالمعيز (تهم بالانصراف)  
جرتفل: إستنى يأم على.. أنا عايزك ماتستخدميش الكانون.. ولا تولعى فى  
البردى.. ممنوع من الآن.. إن أى حد فى البهنسا يحرق السبردى (بصوت  
عال) دى كنوز ياناس حرام حرقها.

أم على: وما الحل ؟

جرتفل: انتظرى (يدخل الخيمة بسرعة ويخرج) أنا أحضرت لك وابور جاز من أفخم  
الأنواع ماركة بريموس (يعمل على إشعاله) وطريقة استخدامه بسيطة جداً  
(يشعل وابور الجاز) اتفقتنا ؟

أم على: حاضر ياخواجة.

سليم البهنساوى (داخلا): صباح الخير ياخواجات موش لازم أيتها خدمة..  
البهنسا كلتها تحت أمركم .... حصلتنا البركة بوجودكم.

جرتفل: ياعمدة أنا يهمنى موضوع المعيز ده.. إنت نساوى تعمل إيه ؟

سليم البهنساوى: لا تشغل بالك ياخواجة، إحنا لازم هنلاقى المعيز. دى بلدنا ما  
تضيعش فيها حاجة. هتروح فين يعنى.. اللي غاب النهاردة بييجى بكره.  
الدار أمان ياخواجة.

جرتفل (يلتفت إلى هنت ويرطن هامساً بالإنجليزية ثم يلتفت إلى سليم البهنساوى) واضح إنك  
متأكد وموش خايف على المعيز.

سليم البهنساوى: ربنا يفرجها ياخواجة.

(ستار)



## اللوحة الخامسة رقصة الجـديان





(قهوة معزة، وتبدو الخيمة.. الوقت في الصباح الباكر.. رويسدا رويسدا بدأ الفلاحون وعمال الحفر يتوافدون، كان أول من ظهر هو الهرمساوى.. وتلاه الباقون، كل يؤدى عمله ولكنهم فى النهاية رويدا رويدا ينضمون بعضهم إلى بعض بما فى ذلك جرنفل وهنت).

الهرمساوى: (وتبدو عليه علامات القلق والإرهاق): صباح الخير يامعزة.. إعملى قهوة سادة.

معزة: قهوة سادة على الصبح! ياشيخ فال الله ولا فالك، إيه اللي جراك؟ وإيه اللي عامله فى نفسك ده؟

الهرمساوى: هو اللي جرى لى ماحدش عارفه.. دى الدنيا كلها عارفاه وعاشد.

رجب: طيب يعنى هو أنت أول واحد فى الدنيا يرعى معيز وتتسرق منه المعيز.. ده شى بيحصل ياما. ماتقلبهاش غم ودراما.

معزة: باراجل صلى على النبى وربنا هيفرجها (لحظة توقف) والله نتفرج.

الهرمساوى: اللهم ما صلى على النبى.. لكن برضه اللي حصل ماكناش عالبال ولا عالخطر (لحظة توقف) معيز البلد، معيز العمدة كلها تتسرق مرة واحدة.

معزة: وإنت فاكرا لما تشرب قهوة سادة وتحزن.. هترجعك المعيز، يا أخى المعيز للجديان قصدى الجدعان، وإنت أجدع جدى فى البلد (يضحك)

رجب: (بهر معزة) بس.. ادخل شوف شغلك (مخاطباً الهرمساوى) أنا متيهالى أحسن حاجة إتك تخليك مع ربنا، وإن شاء الله ربنا هيتخلك تلاقى المعيز.

الهرمساوى: اللي قاطع فى إن العمدة.. عمدة بلدنا الطيب عيان.. وخزيان من ساعة المعيز ماضاعت، موش قادر يحط عينه فى عين أيها حد.

معزة: (عائدا من الداخل وفى يده صينية عليها ماء وقهوة) كلنا صعبان علينا العمدة..

كلنا نعمل أيتها حاجة علشان العمدة .

رجب: ده راجل الحقيقة يتخدم، علشان طول عمره قلبه على البلد.. واحنا كلنا مستعدين لأيتها تضحية.

الهرمساوى: تعرفوا أنا نفسى أعمل من نفسى جدى.. ده كده العمدة يحس إن قلبى معاه.

معزة: ما هو لو كنا نقدر نعمل نفسنا معيز كنا عملنا من زمان لكن إزاي هنسخط نفسنا .

رجب: الصبر طيب يا هرمساوى

(يظهر المغنواى وبصحته الكودية)

المغنواى: سلام.. سلام يارجاله..

الهرمساوى: لاسلام ولا كلام طالما العمدة بتاعنا عيان..

المغنواى: على العموم اللى إنت عامله فى نفسك غلط.

رجب: لكن كلنا لازم نعمل حاجة علشان العمدة.

المغنواى: ماهو أنا جاي علشان كده.. أنا عندي فكرة.. نعمل زار ومندل .

رجب: وهو الزار والمندل هما اللى هيرجعوا المعيز ، ولا هيشفوا العمدة ؟

خضرة: طبعاً... لازم نعمل زار. ده أنا من زمان ماحضرتش زار

المغنواى: (مخاطباً رجب) فى الزار والمندل الحقيقة كلها تظهر.. وبعدين العمدة

لما يشوف البلد كلها معاه.. هيفكر فى صحته ونفسه.. ويمكن المرض

يروح عنه.

الهرمساوى: أنا موافق.. ماهو لازم نعمل أى حاجة.. ولك على يامغنواى إبنى

أنا هاكون أول واحد فى الزار، وأنا برضه اللى هجبلك البلد كلها.

الكودية: (بأدلة طفوس الزار) بسم الله الرحمن الرحيم واللى يحب النبى يصلى

عليه.

الجميع: اللهم صلى عليه.

الكودية: دستور يا أسياى

مدد يا أهل الله

نظرة يا أسياى

(تدق الدفوف والصنوج ويتحلق الجميع حولها ، ويضبط المغنواى الإيقاع ويردد معهم الأغنيات بصوته المميز ، وهم يهزون أجسادهم ويسردون وراء الكودية التراتيل والدعوات)

الرحمة يا أسياى

الشفأ للبهنساوى

ومعاه الهرمساوى

الجميع: الشفأ للبهنساوى ومعاه الهرمساوى

الرحمة يا أسياى.

الكودية: ندعو لصاحب العسادة

صاحب الشمعة صاحبة البركة

صاحب الليلة

ترضى عليه أسياى

الجميع: الشفأ للبهنساوى

ومعاه الهرمساوى

الرحمة يا أسياى

(تشد الهرمساوى إلى وسط الحلقة ، وتجلسه على كرسى وتلف حوله وهى فى حالة جزل متممة ببعض الأدعية.. يتم ذلك وسط نقرات الدفوف والصنوج وارتفاع النغمة وصيحات

متفرقة من المشاركين فى الطقوس)

الكودية: (تخاطب الهرمساوى) مين إنت ؟

الهرمساوى: أنا جدى العمدة

الكودية: وعازب مننا إيه ؟

الهرمساوى: كل معيز العمدة

الكودية: أمركم ماشى يا أسيادنا

البهنساوى والهرمساوى أحبابنا

هاتوا الجدى الكبير يا ولادنا

(يأتون إليها بجدى كبير مقيد... وتمسك سيفاً وترقص حوله)

عرب العريان

يازين عرب الهلالية

عرب العريان

أضاحيكم سنوية

وأمجادكم هلالية

عربان البهنساوية

ناس جدعان

كل سنة يدبحوا جديان

(تذبح الجدى بالسيف من وراء صف المشاركين فى الطقوس.. ثم تظهر وتنتظر بشرب

دم الجدى.. ودهن جسدها وجسد الهرمساوى بدمه)

من كلام الكودية: البهنساوى كلهم جدعان جديان

(يأتون إليها بجلد الجدى وتضعه فوق جسم الهرمساوى.. ورويداً رويداً الجميع يرتدون

(جلد المعيز)

مدد ياسيد العربيان

مدد ياسيدوى

مدد يامرسسى

مدد يا أقصرى

ياشيخنا الكبير وكل المشايخ

ياأسيادنا ياغريبان

هاتوا الجديان

فين الجدعان ؟

المغنواتى: (مذهما فى الغناء والرقص) ياشيخ مُحضَر ياشيخ مُحضَر

اللى عليه سيد يحضَر

نظرة ياأسيادنا.

الهرمساوى: (قام من مجلسه ويزاحم الجميع.. ويصرخ فى وجههم) كله لازم يلبس

معيز.. إحنا كلنا معيز.. (يسك أدهم) إنت جدع وجدى كمان.. لايق

عليكم لبس الجديان.. إنتوا ياجدعان فيسن الجدعان ؟ (يدفعه)

المغنواتى: اللهم صلى على المصطفى.

الجميع: صلى الله عليه وسلم.

الهرمساوى: دلوقت أسيادنا طلبوا منسى طرح المشاكل عليهم... خلينا نشوف

مع بعض المشكلة دى.. هس.. سمع.. كله يسكت علشان أسيادنا

يشوفوا ويسمعوا معانسا..

(يتقدم إثنان من المشاركين فى الحلقوس ويبدأ الحوار بينهما).

جرجس (يتدلى صليب على صدره فوق جلد الجد): يا شيخ عبد الله لكم دينكم ولى دين.. نحن أخوة أحياء.. ولكن قل لإبنك يبعد عن طريقنا. والرب يسعدنا.

عبد الله (يرتد ففطانا تحت جلد الجد ويضع عمة خضراء فوق رأسه): يا أخى الله محبة.. وإبنى يحبكم

جرجس: ونحن نحب محمد إبنك، ولو أذن الرب كل شئ ممكن.

عبد الله: إذن فما هى المشكلة ؟ إنتم تحبوننه وهو يحبكم.. ولا يسعى إلا فى الحلال.. هو طالب القرب منكم.. على سنة الله ورسوله .

جرجس: ما هى دى المشكلة إبنك .. شاب مسلم محترم ، يشهد الناس جميعا له بالصدق والأمانة، وإذا تقدم لأى أسرة فى اليهنسا سيرحبون به.. أى فتاة فى مديرية المنيا كلها تتمنى محمد.. وهو يترك كل هذا ويطلب يد مارية القبطية بنت القبطى ! دى حكاية مالهائش نهاية، لكن إذا الرب أراد ممكن.

عبد الله: يا أخى كلنا أقباط.. أنا قبطى مسلم.. وأنت قبطى مسيحي، نحن جميعا مصريون.

جرجس: ولكن الناس .. من طرفنا ومن طرفكم.. لن يرضوا عن هذا الزواج.. عبد الله: ولكن والنبى الغالى ده محمد إبنى مصمم، وقد أعلن أنه لن يتزوج غير إبنك.

جرجس: هو بالطريقة دى سيوقف حال البنات.

عبد الله: حاشا لله.. هل يطاردها فى الطريق ؟

جرجس: أبدا نحن لم نره منذ أمد طويل.

عبد الله: لقد هرب إلى الصحراء .. إنه يسكن أحد الكهوف.. ولا يظهر إلا مرة واحدة فى الأسبوع، عندما يؤم الناس فى صلاة الجمعة وطول

الوقت في العراق.

جرجس: بارك الرب فيه وفي دينه وأخلاقه.. ولكن لماذا يهجر البلد ؟

عبد الله: إنه لا يهجر الحياة والناس، مجرد فترة اعتكاف.. حتى تحسم المسألة. لقد قال لي.. لا أريد أن ينظر الناس في وجهي.. يتفرسون في.. ويتفرجون على همومي.. ويشمتوا في، لأني أحببت ولأن من أحب.. تستعصي علي.. لقد مال علي صدرى وهو يطلب العفو منى قائلا: اصفح عني يا أبى.. أنا لن أعود إلى البهنا إلا وفي يدي عروستى التى أحببتها منذ طفولتى.

جرجس: ولكن هل يصح أن نعقد قرانا ونقيم فرحا.. ومعيز سليم البهناوى مسروقة ؟

عبد الله: عندك حق دا إحنا كلنا نعمل معيز للعمدة سليم البهناوى (يشد على كتفه جلد الجد ويتوقف عن الحديث قليلا).. يمكن أن نتفق على كل شئ.. ونؤجل الفرغ لحين عودة معيز البهنا.

جرجس: لا.. يا عبد الله.. معيز البهنا.. ده مهر بنتى.

عبد الله: قصدك إيه..؟

جرجس: قصدى واضح يا عبد الله، ومارية بنتى موافقة على هذا المهر. محمد هو المسئول عن إقتفاء أثر المعيز فى الصحراء.. وإرجاعها ؟ هو ده مهر مارية.

عبد الله: ده ممكن يهلك.. شاب صغير.. يبحث عن المعيز.. فى الصحراء.. ده ممكن يروح مسابرجش.

جرجس: يوم ما يرجع بالمعيز هو ده يوم الفرغ.

جرجس: (مرتديا جلد الجد يتقدم من الخلف ويرطن بالإنجليزية مع هنت ويواصل بالعربية).. هى .. هى البردية.. يسهنت دى موتيفة أسطورية.. والناس ماتستش.

لازم اللي عاوز يتجوز يدفع الثمن أوديب حل اللغز واتجوز أرملة الملك.. وحظه هباب طلعت أمه. وهرقل صارع أخيلوس علشان يتجوز ديانيرا فى مسرحيات سوفوكليس اللي أنت عارفها.. شايف أهو محمد لازم يرجع المعيز علشان يتجوز ماريمة القبطية، المسألة واضحة خلص.

هيلين: (مرتدية جند عزة) مستر جرنفل.. الليلة مسافيش مناقشات.. وخناقات (تنظر إلى هنت) وأنت يامستر هنت أرجوك.

هنـت: (مرتديا جلد الجدى ويتحدث بغضب) إنت كده بتخرف يا جرنفل علشان أكلت لحمة رأس الخرقان امبارح. لازم نفصل اللي بندرسه والبرديات اللي بنفك طلاسها بالعافية عن مجريات الحياة.. نساقت تقوللى إن اليونان كان عندهم مولد النبى، وعندهم عروسة المولد وبياكلوا حمص.. زى ما بيحصل الأيام دى فى البهنسا.

جرنفل: ياهنت.. ياخويا إنت متخلف.. ما عنداكشى خيال ولا إبداع.. لازم تعرف إن الحياة من آلاف السنين لم تتغير، والإنسان هو الإنسان فى كل زمان ومكان.. المسائل واضحة جدا.. مسرحية سوفوكليس المفقودة واللى احنا نبحث عنها "مقتفو الأثر" بتقول إن القطعان فقدت.. سرقت، وهرميس أو أحد الأبطال رجعها. والتمثيلية اللي احنا شافناها دلوقت بتقول إيه؟.. محمد البطل مطلوب منه يرجع معيز البهنسا.. هسى هسى.. البردية اللي بنبحث عنها الناس حفظها.. وبيمثلوها.. بطريقتهم.

هنـت: نفرض إن ده صحيح ده هيفيدنى بإيه؟.. المهم البردية الأصلية.. اليونانية جامعة أكسفورد يا حبيبى بتكلم يونانى موش عربى وصعيدى كمان.

جرنفل: المهم إنت وأكسفورد تفهموا إن المصريين بتوع دلوقت عندهم حضارة.. وهم اللي حافظين كل حاجة.. وعن طريقهم هتلاقى مسرحية سوفوكليس.

رجب : ياخواجه إنت وهو، إنتو ضيوفنا.. وعلى عيننا وعلى راسنا.. بس إحنا



موش عايزين خناقة فى الليلة الكبيرة بتاعة المولد، وعايزين نفرش شوية لو سمحتوا، حكايتنا لسة ماخلصتشى.. عايزين نعرف إيه الحكاية وإيه الرواية.. إنتو ناس عندكو ذوق وعارفين عادتنا وتقاليدنا.

هــيـلـيـن: متأسفة يامستر رجب، هم علماء البردى كده، ورقصة الجدبان دي هـي  
اللى حركتهم (نحظة توقف) بس قوللى يامستر رجب هو كدة خلاص  
المعوز هترجع القديس جورج هيرجعها ؟!

رجب: (ضارباً كفاً بكف ومتعجباً) إن شاء الله. (بابستغراب) القديس جورج !!

(تأخذ بيد جرنفل ومنت وینصرفون)

(تاریخ)



## اللوحة السادسة

### انتصار البطل



(فى قهوة معزة ليلا.. يجلس الرواد فى أماكن متفرقة . أما المغنواى فيجلس على أريكة مرتفعة قليلا ، يعزف على الربابة ويجانبه اثنان يعزفان على الربابة أيضا ويرددان بعض المقاطع معه. على الجانب الآخر من المسرح تظهر خيمة البعثة الأثرية)

المغنواى: ياسادة ياكرام قبل ما نبتدى الكلام  
صلوا على النبى الزين عليه الصلاة والسلام،  
وحكايتنا إنتو عارفينها زين،  
محمد البهنساوى صلوا على النبى الزين،  
لما خطب مارية، أبوها قالوا مهرها ترجع للبلد فرحتها،  
وتحطم التلى سرق من البلد ثروتها،  
وترجع لكل فلاحه فى البلد معزتها،  
محمد البهنساوى سمع الكلام وغزا الصحرا،  
وجاب الأسرى  
قابل وحوش وأسود،  
وشاف ليالى سود،  
وفى النهاية ربنا نصره وبالإيمان نور بصره،  
وفضل ماشى ورا الحرامى، ووضع قدمه على أثره،  
خطوة بخطوة لحد ما وصل لغرضه،  
شاف المعيز وعلى الحرامى وقع بصره،  
وقامت معركة بينهم،  
محمد البهنساوى البطل الهمام،  
أعزل من السلاح،  
لكن عزمته أقوى سلاح،  
دخل على الحرامى بصدده، وصرخ فى وجهه كما الأسد،  
حاول الحرامى يطعنه،  
تفادى الطعنة وضرب خصمه بيده فى كتفه،  
وقع السيف وبسرعة خطفه البطل الهمام،

وحاول الحرامي يهرب،  
ومحمد البهنساوى وراه  
وخلص عليه،  
ورجع لنا البطل الهمام.  
ومعاد معيز البهنسا  
وبيغنى على الربابة

(تدرجيا تتحول منصة التمثيل كلها إلى ساحة.. ويظهر على اليمين محمد على ظهر حصان أبيض ويرتدى جلبابا أبيض وتحسوط به بعض قطعان الماعز.. يقترب منه أبوه عبد الله هاشا باشا.. وعلى اليسار يظهر جرجس ممسكا بيد ابنته مارية التي ترتدى فستان الزفاف.. أنغام المزمار البلدى تملأ المكان ويتراقص الحصان.. وبيبطة يقترب جرجس ومارية من الفارس المنتصر محمد الذى يقترب منهما.. ثم يأخذ بيد مارية ويرفعها ليجلسها على الحصان. الذى يسوقه محمد ببطء حول المنصة ثم ينسحب إلى الداخل. ويمكن إخراج هذا المشهد على شاشة جانبية توضع على خشبة المسرح.. بالتدرج يتركز الانتباه على الجانب الآخر. فيسلط الضوء على كوم السباح فى الخلفية والنخيل من حولهما.. وأمام خيمة البعثة الأثرية.. منضدة يجلس عليها هنت وجرنفل. يتحلق حولهم مجموعة من الصحفيين. وفى يد كل منهم ورقة يكتب فيها ملخص ما سمعه وآلات تصوير قديمة يأخذون بها الصور التذكارية، أما هيلين فعلى منضدتها الصغيرة مشغلة كالعادة فى دق بعض الكلمات على الآلة الكاتبة وتصوير بعض البرديات).

هنت: أنتم تعرفوا أننا نعمل هنا منذ ثلاث سنوات. وها نحن فى مطلع السنة الرابعة. فقد آن الأوان بالنسبة لى ولزميلى الأستاذ جرنفل، أن نتوجه بالشكر لأهالى البهنسا الذين ساعدونا كثيرا فى عملنا.

جرنفل: فعلا.. أهالى البهنسا قدموا لنا أفضل أنواع المساعدة.. بالنسبة لى أنا فهمت كل حاجة منهم ومن تراثهم وتقاليدهم.. وعاداتهم و..

هنت: (مقاطعا): وانتم تعرفون أن البهنسا سبقت وأمدتنا.. وأمدت عالم

الكلاسيكيات كله بنصوص أدبية رائعة.. آخرها مسرحية كانت مفقودة من مسرحيات يوريبديدس ، ولم تكن نعرف عنها شيئاً.. عنوانها "هيسبيلي" Hysipyle .. ويهاى لى أن البهنسا لازالت بها كنوز دفينه . وتحتاج لأجيال وأجيال تحفر فيها طول العمر .

مستمع (١): وما هو آخر ما توصلتم إليه ؟

هنت: الحقيقة توصلنا لاكتشاف نصادر .

جرنفل: غير متوقع

هنت: لكن لى نفهم الموضوع أحب أن أذكركم أن شعراء التراجيديا الإغريقية كانوا يقدمون عروضهم فى مهرجانات كبيرة.. وكان يخصص لكل منهم يوم كامل.. يبدأ مع مطلع النهار وينتهى مع الغروب . المهرجانات كلها مرتبطة بأسطورة ديونيسوس، وأنتم تعرفون أن التراجيديا معناها "أغنية الجدى"، لأن الجديان كانت حيوانات مقدسة لديونيسوس، وكان الناس تليس جلود الجديان وتشترك فى هذا الطقس.. وكان الشاعر يقدم ثلاث تراجيديات ثم مسرحية رابعة، لا هى تراجيدية ولا هى كوميدية، وكان يطلق عليها اسم المسرحية الساتورية.

مستمع (٢): ما معنى هذا الاسم ساتورية ؟

هنت: جاءت التسمية من أن أفراد الكورس كانوا يمثلون أتباع الإله ديونيسوس الخرافيين أى الساتوروى، وكان نصف جسداهم بشري والنصف الآخر على هيئة حيوان.. الجدى مثلاً . فكانت لهم ذبول وحوافر الخ. وأنتم تعرفون أن المعيز لها علاقة بخصوبة الأرض وفكرة الخصوبة عموماً.

جرنفل: (محدثاً نفسه) زى معيز البهنسا (مستدركاً) وهذا النوع من المسرحيات الساتورية محير وشغل العلماء كثيراً. ولم تصلنا منه سوى مسرحية واحدة ناقصة ليوريبديدس وعنوانها "الكيكلوبس".

هنت: والآن جاء دور سوفوكليس.

مستمع (٣): مسرحية جديدة !

هنت: نعم.. مسرحية ساتورية جديدة لسوفوكليس عنوانها "مقتفو الأثر" Ichneutae، اكتشفناها هنا.. ففى هذا الكوم الكبير (مشيراً لكوم السباح) أربعمائة بيت من هذه المسرحية أى حوالى نصف المسرحية.

جرنفل: وطبعاً نستطيع أن نعرف الموضوع والحدوث ونكمل خيوطها.. وأنا بصراحة أعتقد أن أهل البهنسا يعرفون حكاية هذه المسرحية ويرددونها فى تراثهم الشعبي، ولكن بطريقة تناسب ظروف عصرهم ولكن ...

هنت (مقاطعاً): المهم عندي أن البهنسا.. والكوم ده بالذات (مشيراً لكوم السباح) أضاف مسرحية جديدة إلى تراث سوفوكليس أعظم مؤلف تراجيدى عرفه التاريخ.

جرنفل: أنا شخصياً مهتم بموضوع تواصل التراث.. حكاية المسرحية عند سوفوكليس إنه هرميس الصبى سرق القطعان وهرب بها.. وهو الذى اخترع المزمار.. والإله أبوللو اكتشف مكان القطعان بإقتفاء الأثر.. وهنا فى البهنسا لما حضرت الليلة الكبيرة ومثلوا قصة محمد ومارية والمعيز المسروقة ورقصة الجديان شعرت أنه فيه تواصل ثقافى.. ولازم ...

هنت (مقاطعاً): أنا أعتقد إن مهمتنا إنتهت.. نحن اكتشفنا نصاً جديداً حفظته لنا البهنسا من آلاف السنين... مسألة شرح مضمون هذا النص.. وعلاقته بهذا التراث أو ذاك.. مسألة متروكة للدراسات المتخصصة ففى المستقبل.. ومستقبل الثقافة أمره متروك للأجيال.

(يسلط الضوء على طه حسين الجالس فى خلفية منصة التمثيل)

طه حسين: عفواً.. أنا كنت هنا فى بلدنا عزبة الكيلو.. ما أنا من نفس المركز التابعة له البهنسا، وكنت فى زيارة لأهلى وعشيرتى... ولما سمعت أن الأستاذ هنت



وجزئيل سيفقدان لقاء للصحافة والمهتمين بالموضوع أردت أن أسمع بنفسى كل شىء.. وأثرت أن أجلس فى هدوء لأسمع كل ما تقولون.. ولقد سمعت بأذنى.. وسررت أیما سرور (لحظة توقف) وأعلن أمام الجميع من هنا.. من الیھنسا أن مصر صاحبة الفضل فى حفظ التراث الكلاسیكى سيكون لها شأن فى هذه الدراسات التى تخدم التراث القومى، كما تخدم التراث الإنسانى.. وستلعب هذه الدراسات دوراً مهماً فى مستقبل الثقافة فى مصر التى تمر بسنوات المخاض الآن. (لحظة توقف) ولكن لى سؤال بامستر هنت... أين البردية الأصلية ألا تعرضها على الناس لكى يشاهدوها بأعينهم ؟

هنت : (متنعماً) دكتور طه... البردية الأصلية فى الحفظ والصون فى المتحف البريطانى، أكبر متحف فى العالم، متحف الامبراطورية التى لاتغيب عنها الشمس ... لا تعلق يا طه !

(ســـــتار الختام)

## مسرحيات أخرى للمؤلف

### ١. كليوباترا تعشق السلام:

مسرحية من ثلاثة فصول. تدور المسرحية حول شخصية كليوباترا السابعة آخر ملوك البطالمة في مصر. ولكنها تقدم صورة مختلفة تماماً عما ورد في النصوص الإغريقية واللاتينية والتراث المسرحي الأوروبي (إثنين جوديل - شكسبير - درايدن - برنارد شو). فهي فسي هذه المسرحية ملكة مثقفة ووطنية تدافع عن مصر في وجه الإمبراطوريسة الرومانية والـ Pax Romana لأنها صاحبة رؤية جديدة عن السلام يمكن أن نسميه السلام السكندري Pax Alexandrina قوامه التآخي بين الشعوب والمساواة والعدل، والمظلة الرئيسية لذلك كله الحسب. والمسرحية تعكس ما جرى في مصر والشرق الأوسط من أحداث سياسية فسي منتصف القرن العشرين.

الهيئة المصرية العامة للكتاب ١٩٨٤، نفدت وتعد الطبعة الثانية للنشر. وقد ترجمت إلى الإيطالية (١٩٩٢) واليونانية (١٩٩٩) والفرنسية (١٩٩٩) والإنجليزية تحت النشر.

### ٢. عودة البصر للضيف الأعمى:

مسرحية من فصلين. تعد هذه المسرحية إعادة صياغة لمسرحية أريستوفانيس "بلوتوس" حيث الأغنياء يصبحون فقراء وهؤلاء بدورهم يتحولون إلى الغنى. "هذه التقلبات الاقتصادية الجارفة تؤثر على المجتمع وتقلب الهرم وتغير في المفاهيم والقيم. وهذا بالضبط ما تعاني منه الكثير من دول العالم العربي والعالم الثالث بصفة عامة. وهذا ما تعالجه المسرحية فسي شكل كوميديا سوداء.

الهيئة المصرية العامة للكتاب ١٩٨٦ وعرضتها فرقة "المسرح العربي" بالكويت تحت عنوان "الدينار" ١٩٨٣. وتعد الترجمة الفرنسية للنشر.

### ٣. الحكيم لا يمشي في الزفة:

مسرحية من خمس لوحات. تحتفي هذه المسرحية بعملات المسرح العربي توفيق الحكيم. حيث جرى لقاء بينه وبين أريستوفانيس حول تيمة "برلمان النساء" التي عارضها توفيق الحكيم. والمسرحية الحالية تعد معارضة جديدة لمسرحيتي الشاعر

الإغريق والمؤلف العربي، وفي سخرية لاذعة وبشفاقية تقترب من روح أريستوفانيس تتم مناقشة الأحوال الثقافية والسياسية المعاصرة في مصر.

نشرت بمجلة "عالم الكتاب" بمناسبة الذكرى الأولى لوفاة توفيق الحكيم. وعرضت بالأقصر يوليو ١٩٩٠ وعرضت بالفرقة المركزية للثقافة الجماهيرية بالقاهرة ودار الأوبرا صيف ١٩٩١. وتعد الترجمة الإيطالية والفرنسية للنشر الآن.

#### ٤. زفاف عروس المكتبات:

مسرحية من خمس لوحات. تعالج هذه المسرحية مكتبة الإسكندرية القديمة ومشروع إحيائها الحديث. وهي تخلط بين الماضي التاريخي والحاضر المعاش وتقوم على فكرة المسرح داخل المسرح. وفيها تتسآلف الأسطورة والواقع وتتجاوز الشخصيات الأسطورية والتاريخية مع إبناء الاسكندرية الحديثة التي تجمع بين جاليات مختلفة كما كانت الإسكندرية القديمة.

#### ٥. هرقل فوق جبل أويتا (ترجمة):

لسينكا، سلسلة من المسرح العالمي الكوينية عدد ١٣٨ مارس ١٩٨١ وأذيعت بالبرنامج (الثاني) الثقافي.

#### ٦. السحب (ترجمة):

لأريستوفانيس: نفس السلسلة عدد ٢١٥ أغسطس ١٩٨٧ (المقدمة) وعدد ٢١٦ سبتمبر ١٩٨٧ (النص) وأذيعت بالبرنامج (الثاني) الثقافي.

#### ٧. بنات تراخيس (ترجمة):

لسوفوكليس نفس السلسلة عدد ٢٤٩ يونيو ١٩٩٠ وأذيعت بالبرنامج (الثاني) الثقافي. وقدمت منها بعض المشاهد في المهرجان الدولي السادس عن الدراما الإغريقية، قبرص سبتمبر ٢٠٠٠.

#### ٨. هرقل مجنوناً (ترجمة):

ليوربيديس، تحت النشر.

## المحتويات

رقم الصفحة

٧	على سبيل التمهيد .....
٩	الشخصيات بترتيب ظهورها .....
١١	اللوحة الأولى : سنوات المخاض .....
٢١	اللوحة الثانية : أكلو البردي .....
٣١	اللوحة الثالثة : تواصل .....
٣٩	اللوحة الرابعة : رسالة خاصة إليك من آلاف السنين .....
٤٩	اللوحة الخامسة : رقصة الجديان .....
٦١	اللوحة السادسة : انتصار البطل .....
٧٣	مسرحيات أخرى للمؤلف .....

رقم الإيداع بدار الكتب: ١٧٠٥٢ - ٢٠٠٠

الترقيم الدولي: I.S.B.N: 977-17-0077-9